

## **300 penyelidikan jadi tarikan Hari Terbuka UMP**



Kuantan, 9 Mac - Sebanyak 300 hasil penyelidikan Universiti Malaysia Pahang (UMP) dipamerkan dalam Pertandingan Reka Cipta, Kreatif dan Inovasi (CITREx) untuk dikongsi bersama masyarakat berjaya menyemarakkan penganjuran Hari Terbuka UMP 2015. Pengunjung dapat saksikan sendiri penghasilan projek-projek penyelidikan yang mengenangkan elemen kepakaran dan kreativiti penyelidik melibatkan 183 staf dan 117 pelajar di universiti ini dipamerkan pada Hari Terbuka UMP ini. Antara yang menjadi tarikan adalah kunjungan ikon dakwah, Ustaz Don Daniyal yang berpeluang bertemu dengan warga UMP dalam Program Sirah Rasul, Program Saintis Muda dan Fun Learning English.

Pemangku Timbalan Naib Canselor (Akademik & Antarabangsa), Profesor Dr. Wan Azhar Wan Yusoff berkata, pengunjung bukan sahaja berpeluang menyaksikan pameran penyelidikan malahan ianya juga dapat membantu pelajar memilih program yang bersesuaian untuk menyambung pengajian di peringkat yang lebih tinggi.



"Mereka dapat terus mendapatkan maklumat pengajian dan melawat makmal serta sistem pengajaran dan pembelajaran program pengajian di UMP yang menawarkan program-program dalam bidang kejuruteraan dan teknologi di semua peringkat pengajian bermula dari Diploma, Sarjana Muda sehingga ke peringkat lebih tinggi seperti Sarjana (Master) dan Ijazah Kedoktoran," katanya.

Majlis Perasmian Hari Terbuka UMP dan Penyampaian Hadiah CITREx akan diadakan pada hari esok, Selasa yang akan dirasmikan Naib Canselor UMP di Dewan Kompleks Sukan UMP kampus Gambang. Bersempena dengan itu turut berlangsung penganjuran Karnival Mahabbah anjuran bersama Pusat Islam dan Pembangunan Insan (PIMPIN) dan Karnival Bahasa dan Kebudayaan Cina dengan sokongan Pusat Bahasa Moden dan Sains Kemanusiaan (PBMSK).



Penganjuran Program Karnival Mahabbah dengan menonjolkan beberapa Ceramah, Kekeluargaan dengan tajuk ' Isteri K-POP Suami Dangdut', Bicara Alam Metafizik, Forum Muqarrabin , Forum Perdana Ehwal Islam dan Konsert Malam Cinta Ilahi bersama Kumpulan Raihan.

Lebih 3000 pengunjung dari kalangan pelajar sekolah dan orang ramai hadir pada hari pertama Hari Terbuka yang akan berakhir esok dan pada hari perasmian nanti akan diadakan persembahan kebudayaan pelajar dari Yamaguchi Universiti Japan yang sedang mengikuti program mobiliti di UMP juga persembahan "tarian tempur" oleh askar wataniah.

Bagi pengunjung, Siti Nur Nadirah Mohd. Salami, 19 dari Kolej Matrikulasi Pahang melahirkan rasa seronok dapat hadir menyaksikan pameran dan menyertai aktiviti yang diadakan. Beliau yang berhasrat menyambung pengajian dalam bidang elektrik mendapat banyak informasi dan persiapan untuk melangkah ke menara gading.



#### **Disediakan Unit Perhubungan Awam, Bahagian Komunikasi Korporat PNC**

Posted By : SITI SARAH BINTI MOHAMAD RAJIMI Date Posted : 09-03-2015, 17:09:09